

## Relazion dl ann 2023

di assessorac: jëuni, sport, cantier de chemun y palé nëif

### JËUNI– SPORT

#### Instà vif:

Tl ann 2023 iel unì urganisà, deberieda cun l'assessëura per la families Martina Comploi, per l segondo iede l "Instà vif". Chèst iede à fat pea cin' lies: l FC Gherdëina, l Schiclub, l Tennisclub Urtijëi, la lia La Vëta y per l prim iede nce l Rodes Gherdëina. N à ulù ti dé inant chësta puscibltà sëuraprò ala mutans y ai mutons dla scola elementera y mesana per fé sport y vester creatifs ntan l'instà. L proiet ie jit dai 26 de juni nchin ai 25 de agost y à pità de ndut neuf enes de sport y creatività.

#### Autri proiec sustenii dal Chemun:

- **MUDA:** D'ansciuda de chëst ann fina via l terzo ann dl proiet Muda, na scumenciadiva metuda su tl ann 2021 da na grupa de lëur y che dal 2022 vën metuda a jì y coordinada dala lia VKE.
- **Coding for Kids:** Chësc proiet pieta enes de curs de programé sun computer y va chesc instà tla terza edizion. L ie n proiet metù a jì dal team Coding for Kids te plu luesc dla provinzia.
- **Sport und Schule:** na scumenciadiva metuda a jì dala scola elementera deberieda a ot lies sportives per ti dé la puscibltà ala mutans y ai mutons de sté deplù dedora se dedican al muviment y al sport ntan l ëures de scola. Tl ann 2023 iel nce unì cumprà da pert dl Chemun 160 malietes per l turnoi de juech al palé dla scola elementera ala fin dl ann de scola.

Chisc proiec à n sustëni sibe finanzia che nce de nfrastrutures da pert dl Chemun. Sëuraprò ie la iscrizions de duc i proiec da instà unides coordinedes a na maniera che n à pudù jì ora cun duta la nfurmazions te un n iede. Na gran sauridanza per la families.

#### Lies dal sport:

L ie unì cialà de manteni l plu che la va l cuntat cun la lies dal sport, auzan ora la grandiscima mpurtanza che les à per duta la sozietà. Per cie che reverda i cuntribuc, sibes urdineres che straudineres, iel unì tenì cont dassënn dl'ativiteies che la lia pieta ai jëuni. L Chemun de Urtijëi à nce finanzia pea, coche udù dant dala "tle" dla valeda, la gran manifestazions sportives a nivel de valeda, danter chëstes la Copa dl Mond, la Gardena Hero, la Gardenissima, i turnoi de tennis, la garejeda de sauté Dolomites Saslonch Half Marathon y la Sellaronda Bikeday. Tl 2023 iel unì dat n cuntribut sëuraprò al Tennis Urtijëi per la realizazion de doi ciamps dal padel.

### **Festa dla lies:**

Coche da tradizion iel unì metù a jì l ultim di dl ann na pitla festa te chemun cun duta la lies de Urtijèi. Ne bela ucajon per la lies y i cunselieres per se cunëscer y s'la ciaculé cun i presidënc dla lies. N à nsci cialà de ti sentì gra per dut l gran lëur che i fej per l luech.

### **Nëus Jëuni Gherdëina:**

L ie unì sustenì la Nëus Jëuni Gherdëina te si ativateies plu mpurtantes. Deberieda cun la Nëus Jëuni y nce cun la grupes di jëuni dla valeda se an sentà adum plu iedesc per cialé co y cie ti pité ala jëunes y i jëuni per ti fé sentì miec y plu trac ite tla vita dl luech. Sëuraprò ti iel unì dat n ufize nuef ala Nëus Jëuni Gherdëina, sëura la bibliotech, nsci che i ebe plu lerch tl local di jëuni per se dé ju cun ëi. Per l local di jëuni "Saut" iel unì dat n finanziaimënt da pert dl chemun per sfiè ju l fonz de lën.

Leprò iel unì purtà la ghiranzes di jëuni tl gremium dla Consulta Provinziela di Jëuni, mantenian nsci l cuntat cun l i raprezentanc provinziei de cumpetënza. Tlo iel dantaldut unì metù a jì sëires de nformazion per i jëuni y jit tla scola auta ITE a Urtijèi a prejenté la Consulta cun duta si funzion de mediatëur danter la provinzia y la jëunes y i jëuni.

### **Festa di 18 ani:**

Ai 27 de utober 2023 iel unì metù a jì la festa tradizionela di 18 ani cun ndut 68 jëunes y jëuni dl ann 2005 de duta la valeda. N se à ancuntà tl local di jëuni Saut a Urtijèi ulache n à metù a jì mëises turondes cun deplu referënc de uni ciamp che à cuntà de si esperienza de vita y spiega truepa cosses mpurtantes coche i dërc y i duvieres che n à do i 18 ani. Daldò iel mo unì metù a jì n juech y pona iesen mo stac deberieda s'la ciaculan y s'la cuntan pra zeche da maiè y da beber.

### **"S junge Ehrenamt":**

Coche Chemun de Urtijèi àn fat pea pra l cuncors "S junge Ehrenamt" metù a jì dal'organizacion a tèt dla lies di jëuni dla provinzia "Südtiroler Jugendring" per renfurzé l ulentariat di jëuni. Per l ann 2023 à i Chemuns dla Provinzia de Bulsan cun 2.000 nchin a 5.000 zitadins pudù fé pea. Deberieda cun bën 36 lies de ulentariat de Urtijèi che se dà ju cun jëunes y jëuni àn fat pea a chësc cuncors dajan ju d'uni sort de nformazions y respundan a uni sort de dumandes. L Chemun de Urtijèi ie unì cris ora danter i primes cin' miëur chemuns dla Provinzia. N bel recunescimënt per l'atività de duta la lies de nosc luech.

### **Meric sportifs:**

Per se cungratulé di meric sportifs arjont àn nvià te jonta l atlet Daniele Bagozza, che à venciù tla sajon da inviern 2023/2024 cater gares de copa dl mond de Snowboard, y l jugadëur de juech al palé y capitan dla prima squadra dl FC Gherdëina Lukas Demetz y l president de ntlëuta dl FC Gherdëina Alfred Runggatscher per avèi venciù l campionat de prima categoria tla sajon 2022/2023 y avèi arjont coche prim iede te Gherdëina la categoria provinziela plu auta de juech al palé (Landesliga/promozione). Tina Stuffer, che à venciù l arjënt ndividuel y l or a copies ti campionac mundiei cun la luesa sun purtoi naturel tla sajon da inviern 2023/2024, vën nvieda tla proscima enes.

### **Sportverband:**

Tl 2023 iesen jic inant cun l'idea de mëter su na lia dal sport che sta a cè de duta la lies dal sport de Gherdëina. N à fat plu ancuntedes cun l raprezentant dl raion dl VSS y cun duta la lies

dal sport per cialé co la mplanté dut ntëur. L vën sustenì chësta idea ajache n ie dla minonga che la dajëssa dessegur na grandiscima man ala lies per cie che reverda duta la burocrazia che devënta for plu y plu cumplicheda.

### **Garejeda di chemuns**

Ai 11 de merz dl 2023 iel unì metù a jì, coche bele da tradizion, la garejeda de schi danter i dependënc, i cunselieres, i assessëures y i ambolc di trëi chemuns de Gherdëina sun Secëda.

### **Nfrastrutures:**

#### **Ciamp dal palé:**

Deberieda cun l FC Gherdëina ons cialà de fé dut i lëures che fova de bujën pra l ciamp dal palé. Ntan l instà iel unì metù ite y spartì ora te dut l ciamp cater mile chilo de graniei de gumis. Davia che la prima squadra dl FC Gherdëina vencia l campionat de prima categoria tla sajon 2022/2023 ie jic su te la categoria provinziela plu auta (Landesliga/promozione) iel udù dant de nueva regules per l ciamp dal palé. La plu mpurtanta ie la mesures dl ciamp dal palé, che muessa vester minim 100 metri lonch y 60 metri lerch (cun 4% de toleranza). Davia che l ciamp de Urtijëi ie mé 96 metri lonch y 52,5 metri lerch ne à l ciamp nia i recuisic udui dant, nsci che l FC Gherdëina ne possa nia plu fé la partites te chësc ciamp. N à purvè plu iedesc a rujené cun la federazion, ma purtrüep ne possen fé nia. Sëuraprò iel unì slungjà l cuntrat per la gestion dl ciamp dal palé cun la nfrastrutures cun l FC Gherdëina per cin' ani.

#### **Cësa dla lies:**

L ie unì fat n'ancunteda cun n architët y i rapresentanc de uni lia che à si sënta tla cësa per cialé tres duta la cësa per valuté i lëures che sarà da fé tl daunì per derturé su la cësa a na maniera de la manteni bën. Dantaldut se tratel dla porta de ntreda, i vieresc, la porta tla sala dala mostres cun na vetrata nueva, l sistem de sciaudamënt, l sistem dla chertes per giaurì la portes, y mo n valgun mëndri lëures.

#### **Palestra:**

N à laurà dassënn sun la tematica dla palestra a Urtijëi. Davia che dala prejentazion dl proiet de na palestra nueva tl zënter dal tennis de Urtijëi de dan ades doi ani iel unì ora che la luegia ne ie nia adateda per la lies y dantaldut per la scoles, se àn muet inant per abiné na nueva soluzion. N à ciarià n tecnich per fé n stude de fatibltà per na palestra nueva tl zënter dal sport Mulin da Coi. Davia che l se trata de n grunt tl Chemun de S.Cristina ie l proiet unì prejentà de agost dl 2023 ala jonta de S.Cristina. Te chësta ucasion iel unì sotrisseda dala jonta dl Chemun de Urtijëi la mpurtanza de jì inant tla direzion de n zënter sportif Mulin da Coi. De utober àn pona prejentà l proiet te na senteda cun la jonta de Urtijëi, de S.Cristina y de Ciastel ai/ala presidënc/tes dla lies dal sport de Gherdëina, ai/ala diretëures dla scoles de Gherdëina y ala/i nseniantes/c de ginastica de la scoles de Gherdëina. Te chësta ucasion iel unì ora dala scoles dantaldut che la luegia sibe mpue desman y dala lies dal sport che i ne ebe nia plu chësc gran bujën de na palestra ma deplù de n local cun njinies per fé pëisc. Nsci iesen jic inant te chësta direzion cialan per la lies dal sport de abiné na soluzion per n local da fé pëisc nsci che la palestres bele a dispuzion te la valeda posse basté per si esigënzes. Per cie che reverda la scoles, davia che tla scola elementera iel nce unì auzà l'ëures de sport de uni tlas ntan l'ena, iesen tl lëur de abiné na soluzion per la plaza dala dlacia via n Setil a fé a na maniera che n

possa la nuzé per deplù mënsc. Cun chisc doi vares, adum a na miëura urganisazion per nuzé la palestres che ie a disposizion, iesun tla minonga che n ie boni de ressolver l problem cun n custimënt limità permez a frabiché na nueva palestra.

### **Palestra da fé pëisc:**

Do che dala senteda per la prejentazion dl proiet de na palestra nueva tl zënter dal sport Mulin da Coi ie unit ora da pert dla lies dal sport che l ie n gran bujën de na palestra per fé pëisc, davia che l sport se à svilupà dassënn ti ultim ani y à nce mudà i bujëns dla lies dal sport, àn tëtut la dezijion de cialé de ressolver chësc bujën. Bele do n valgun mënsc iesun stac boni de abiné na luegia, plu avisa te n local sëura la palestra dla scola elementera che fova udù dant ntlëuta propi per na palestra da fé pëisc ma che purtruep ne vën bele dai ani nia plu nuzà. Deberieda ala scola auta ITE, davia che l se trata de na nfrastrutura provinziela, y ala lies dal sport ti àn cialà avisa al local y a coche n possa la mplanté per fé na palestra cun njinies de aldidancuei. Ntant àn bele tëtut su cuntat cun depiu firmes che à nce bele mandà si preventif per la njinies y coche Chemun àn cialà de udëi dant i scioldi tla bilanz per mèter a jì l dut.

### **Plaza dala dlacia Setil:**

De auton dl 2023 àn tëtut la dezijion de fé inò la plaza dala dlacia via n Setil mpian nce l mplant per sferdé la dlacia per la pudëi nuzé plu giut. L fova dut njenià ca a puntin ala fin de utober per scumencé cun l fé la dlacia canche purtruep de nuet ai prims de nuëmber iel unì ju na smueia sun la roles da sferdé la dlacia y à nsci desdrù gran pert dl mplant. De gra al gran lëur da pert di lauranc de chemun y de l Hc.Gherdëina iesun mpo stac boni de mèter a jì la plaza cun dlacia naturela giaurian nce per l publich dai 30 de nuëmber inant. N à pudù se nuzé dla plaza dala dlacia per passà doi mënsc. Finà l inviern, àn riesc cialà co jì inant cun la plaza davia che gran pert dl mplant ie unì desdrù dala smueia. Deberieda a na firma spezialiseda te chësc ciamp àn cialà duta la situazion cun uni sort de pusciblteies che n à per fé zeche sciche se toca che tën ti ani. N ie dia minonga che la miëura soluzion ie chëla de fé la dlacia sëura l cantier de chemun, sota l tët ite, ulache la fova nce bele ntlëuta. Chësc ëssa de gran vantajes: n possa la nuzé scialdi plu giut, la adurvëssa scialdi manco energia, ajache l fonz ie ndrèt y n muessa mé fé n valgun zentimeter de dlacia, la ie sot a l tët ite y nsci àn degun risch che l nëif ite canche n fej la dlacia o che l vën ju na nueva smueia, la ressulvëssa l problem che n à cun la plaza dai auti de inviern dantaldut cun i busse tl mëns de dezëmber, y nsci inant. N ie tl lëur de cialé cun la firma coche n dëssa avisa la mplanté.

### **Skatepark – plaza per i jëuni:**

N à cunlaurà inant deberieda cun la lia “Rodes Chedres” per cialé de abiné na soluzion per n skatepark. Do plu ispezions te plu posc iesun stac boni de abiné na luegia ulache tl prim mumënt semiova che l se lascia fé. L’idea ie chëla de fé na plaza per i jëuni, ulache ne ie nia mé n skatepark ma nce per ejëmpl n cëst da basket, na “slackline” y nsci inant. N à pona lascià fé vel pitl dessëni, deberieda cun la lia, de coche l pudëssa cialé ora y cialà do per ciche reverda la statica. Chësc proiet se à pona tl ultima enes dassënn cumplicà ajache ie unit ora n stude de fatibltà de n proiet mpurtant dla Comunità raionela Salten-Scilier avisa te chësta luegia che fova ududa dant a fé la plaza per i jëuni. Riesc do iesun pona jic inant a crì alternatives y n à nce bele sun mëisa vel’idea de coche n pudëssa la mplanté. N se rënd cont che l ne ie nia saurì a abiné n post adatà per vel da de tel, ma n lëura inant per vester boni de arjonjer al plu prësc na soluzion.

**Boulderhalle Tennis:**

Davia che l local da jì a "Bouldern" tl zënter dal Tennis a Runcadic ova de bujën de n valgun lëures de manutenzion, dantaldut per tofes y mufa che à scumencià a unì ora sota i tepih, se àn ancuntà cun la lia dl'arpizada sportiva de Gherdëina per cialé cie lëures che fossa da fé. De ndut vëniel fat lëures per zirca 10.000 euro dajan coche cuntribut ala lia.

**CANTIER DE CHEMUN**

Per cie che reverda l cantier de chemun, iel unì fat uni sort de lëures, dantaldut urdineres, per manteni bën y coche l se toca nosc luech. Ndut lëura pra l cantier dl chemun de Urtijëi al mumënt cin' lauranc ntan dut l ann y un n laurant ntan l'instà che se cruzia dantaldut dla plazes da fé damat. Chëst ann de ansciuda ie jit n laurant n pension y nsci iel unì scrit ora na stiera nueva per n sostitut.

Tlo dessot n valgun lëures plu mpurtanc fat ntan l ultim ann:

- D'instà iel unì sià troies, ronesc, parcs y tòc de pra de Chemun.
- L ie unì scuà y rumà su la stredes de Chemun.
- l lauranc à njenià ca y judà pra truepa manifestazions che vën metudes a jì ntan dut l ann a Urtijëi. Suënz ai nce tëtut ca y metù su l palch per la manifestazions. De inviern se à l palch purtruep rot y n à messù l cuncé.
- L ie unì apustà sel, giara de uni sort, asphalt, y n.i. per l cantier de chemun.
- L ie unì nciarià na firma da tlo per judé d'inviern a purté demez la nëif cun camions.
- L ie unì cumprà guant y material, de chël che i lauranc à de bujën per lauré.
- L ie unì sotscri n cuntrat neuf cun l Eni per jì a fé penzin cun la mascins dl cantier de chemun.
- N ti ie stac do a dut cie che reverda la senialetica dl luech.
- L ie unì jit cun asphalt per cuncé i majeri bujes tla stredes dl luech.
- L ie unì cuncià roles dal'ega che stravova.
- L ie unì cumedà ca dut l tët de na rola tl ruf sota la cësa Fëur.
- L ie unì fata nueva, de lën, duta la luegia ulache vën metù l sel tl cantier de chemun.
- L ie unì cuncià pozzetti y cubetti tla stredes dl luech.

**Cumedà troies, sceles y sieves:**

L ie unì cumedà troies y cuncià sceles y sieves te dut l luech, dantaldut tla streda Mureda, tl troi danter la streda Mëisules y la streda Scurcià, dal servisc soziel, tl troi danter la scola mesana y la plaza da fé damat da Fussel de Nis, tl troi danter la streda Sobosch y la stazion a val dla ferata de Resciesa, tla streda Purger daujin al troi da jì cun la roda, y nsci inant.

**Mascins y massaria:**

- L ie uni baratà ora l vedl Velos, cun n neuf Holder S100 dla firma Komland.
- L ie unì cumprà n neuf agregat.
- Mëndra massaria ie unida njenieda: ciadëines, montli, peles dala nëif, gherneies y nsci inant.

- L ie unì cialà do la mascins y fat la revijions di auti.

**Palé la nëif:**

Ntan l inviern 2022-2023 al nevèt relativamënter puech permez ai ultimi ani. De ndut al fat zirca 80 zm de nëif. Ntan l inviern 2023-2024 al inò nevèt deplu, ntëur ai 140 zm. l lauranc de chemun cun duta la mascins a despusizion à fat n bon lëur per tenì la stredes, troies y plazes dl luech bel nëc. Ora dla doi firmes bele nciarieses dal Chemun, à chësc inviern judà na firma da tlo cun n camion per n valgun ëura a rumé demez la nëif tla stredes plu strëntes. Sëuraprò à nce persones privates inò judà a palé troies y plazes per l Chemun.

Davia che n adrova for inò lerch da mëter ju roba, dantaldut nce l palch che tol ca na gran lerch, àn lascià fé n stude de fatibltà per fé na sort de tèt tl raion artejanel. Te chësta luegia fossel lerch assé per l cantier de chemun y nce per lascé l palch a sosta.

Per dut chisc lëures ti va n ringraziamënt ai lauranc dl cantier de Chemun y ai dependënc di ufizies dl Chemun de Urtijëi. De gra.

Cun de biei saluc,  
assessëur Janpiere Prugger

